

## **Penangguhan bayaran PTPTN dilanjut hingga 6 bulan**

**Malaysiakini**

**23 Mac 2020**

Kerajaan bersetuju melanjutkan penangguhan bayaran balik pinjaman Perbadanan Tabung Pendidikan Tinggi Nasional (PTPTN) daripada tiga kepada enam bulan.

Penangguhan itu melibatkan jumlah kutipan sebanyak RM750 juta.

“Penangguhan ini yang berkuat kuasa serta-merta pada hari ini sehingga 30 September.

2020 dijangka akan memberi manfaat kepada hampir 1.5 juta peminjam PTPTN,” kata Perdana Menteri Muhyiddin Yassin dalam sidang media di Putrajaya sebentar tadi.

Pada 19 Mac lalu, kerajaan membenarkan penangguhan selama tiga bulan berkuat kuasa serta merta selama tiga bulan sehingga 30 jun 2020.

Langkah itu diambil bagi susulan perintah kawalan pergerakan bagi membendung penularan wabak Covid-19.

Sementara itu, Muhyiddin turut menjelaskan kerajaan bersetuju memberi peruntukan sebanyak RM130 juta kepada kerajaan negeri bagi membantu membendung wabak Covid-19.

“Peruntukan sama rata akan diberi kepada setiap negeri, tanpa mengira parti mana yang membentuk kerajaan negeri berkenaan,” katanya.

Menurut beliau krisis yang sedang dihadapi ini memberi kesan kepada semua rakyat tanpa mengira kaum, agama dan kecenderungan politik.

“Sebab itulah saya berpandangan, semua pihak - tanpa mengira fahaman politik - mestilah bersama-sama berganding bahu dan bersatu-padu untuk menangani krisis yang sedang kita hadapi ini,” katanya lagi.

Ketua Pengarah Kesihatan, Dr Noor Hisham Abdullah, semalam mengumumkan terdapat 123 kes positif Covid-19 baru di negara ini menjadikan jumlah keseluruhan 1,306 kes.

Satu kematian baru hari ini turut menjadikan jumlah korban akibat wabak itu di

Malaysia sebanyak 11 orang.

**Copyright © 1999-2012 Mkini Dotcom Sdn. Bhd**

Source: <https://www.malysiakini.com/news/516241>